

*Meneer Nigel Matthew:*

## Un maestro no mag laga niun mucha keda cu cicatriz

ORANJESTAD- Un docente cu hopi aña di experiencia, un artista multifacetico, un persona conoci pa no solamente soña, pero tuma accion, esey ta Nigel Matthew, kende a ricibi e Appel di Oro Lifetime Achievement Award 2015 pa su trabao cu el a eherce semper cu hopi passion.

“E ta dificil pa descubri e gevoel na e momento ki. Mi ta ainda un poco asombra y emociona”, e ta splica den un entrevista despues di ricibi e premio. Meneer Matthew a splica cu semper a haci su trabao incondicionalmente, e no a haci su trabao bao di cierto condicionnan pa haya un elogio of “algo asina”, y e ta sinti su mes honra cu e distincion. E ta masha bunita, el a bisa, emociona despues di e ricibi un “standing ovation” e anochi di Appel di Oro.

“Pa mi ta gewoon mi trabao, mi deber, mi ta haci,” Nigel



Matthew a expresa, y e ta haci esey miho posibel. E docente di arte cu a ocupa posicionnan di liderazgo na Colegio Arubano den transcurso di añanan ta conoci como un “doer”,

un persona cu ta “haci”. E ta bisa cu esey ta loke e ta kere aden, pa no solamente soña, pero haci!, yuda! y educa! Nigel Matthew ta di opinion cu “nos como docente” por ta

mas consciente pa cu e forma cu nan ta anda cu e parti hopi importante den bida di muchanan, esta nan educacion. “Nos tur ta corda kico un maestro a yega di bisa nos,

sea positivo of pa kibra cos” Un maestro na mag laga niun mucha keda cu un cicatriz” Matthew a bisa enfaticamente. E la agrega cu ta wordo hopi bisa cu “e mucha ta central”, pero e pregunta ta si di berdad e dicho aki ta wordo aplica. Meneer Matthew ta expresa cu e ta kere hopi cos ta wordo haci, por ehempel e Luna di Enseñansa organisa pa Minister Michelle Hooyboer-Winklaar, pa haci e maestronan un tiki mas consciente di kico nan profesion ta encera. E ta splica cu mas e docentenan bay den e direccion di un consciencia eleva pa cu nan profesion, ta necesario pa studia e psicología di e alumno moderno. “Nos ta bibando den otro epoca,” e ta subraya, y ta boga pa docentenan siña mas tocante e alumno aki y ta conseha pa adkiri e miho instrumentonan pa por traha cu nan. Nigel Matthew ta conclui bisando cu e ta un tarea di e docente pa haci esaki. □